

J. Wang, préparation à l'agrégation de Lettres Modernes, 2021-2022
À rendre avant le lundi 27 décembre (par mail en format pdf)

Version latine n°7 : la vie laborieuse des abeilles

Ac ueluti lentis Cyclopes fulmina massis
cum properant, alii taurinis follibus auras
accipiunt redduntque, alii stridentia tingunt
aera lacu ; gemit impositis incudibus antrum ;
illi inter sese magna ui brachia tollunt
in numerum uersantque tenaci forcipe ferrum :
non aliter (si parua licet componere magnis)
Cecropias innatus apes amor urget habendi,
munere quamque suo. Grandaeuis oppida curae
et munire fauos et daedala fingere tecta.
At fessae multa referunt se nocte minores,
crura thymo plenae : pascuntur et arbuta passim
et glaucas salices casiamque crocumque rubentem
et pinguem tiliam et ferrugineos hyacinthos.
Omnibus una quies operum, labor omnibus unus :
mane ruunt portis ; nusquam mora ; rursus easdem
uesper ubi e pastu tandem decedere campis
admonuit, tum tecta petunt, tum corpora curant ;
fit sonitus, mussantque oras et limina circum.
Post, ubi iam thalamis se composuere, siletur
in noctem, fessosque sopor suus occupat artus.
Nec uero a stabulis pluuia impendente recedunt
longius aut credunt caelo aduentantibus Euris ;
sed circum tutae sub moenibus urbis aquantur,
excursusque breues temptant et saepe lapillos,
ut cymbae instabiles fluctu iactante saburram,
tollunt, his sese per inania nubila librant.

Virgile